

AKASHVANI AIZAWL
REGIONAL NEWS UNIT
REGIONAL NEWS BULLETIN
(MIDDAY)

Friday, September 12, 2025

Time - 2:30pm - 2:35pm



PM VISITS

Prime Minister Narendra Modi-a'n Mizoram a rawn tlawh tur chungchangah, Aizawl Municipal Corporation (AMC) chuan kawngpui ana dawr leh mimal office te chu khar turin a hriattir.

Thuampui Helipad atanga Lammual panna kawng, Chaltlang leh Ramhlun kawngpui ana dawr leh mimal office te chu khar tur a ni a, he thupek hi September 13, Inrinni zingkar atanga hman tur a ni ang.

Thupek chhuaha a lan dan chuan - Permanent building a dawr (shop) awmte chu hawn theih a ni a. VVIP-in Thuampui Helipad a chhuahsan leh hma loh chuan insak leh construction work dang zawng zawng zawng te chu lo thawh rih loh tur a ni.

VVIP-in Thuampui Helipad a chhuahsan leh hma loh chuan street vendor (chawhmeh zuar, zingkar thingpui dawr siam, hawker leh a dangte) te thut phal a ni lo. Hei hian Mizoram Legislative Assembly building leh a chhehvela chawhmeh, thei, etc. zuarte a huam tel ang.

Workshop (lirthei, steel, aluminium, furniture, etc.) ten VVIP chetvel lain (transit hour) hnathawh an lo chawlhan rih tur a ni, an ti bawk.



Gun Violence Protest

Bawngkawna silaia mi kaptu, Rochhingpui chu vawiin khan CJM Laldinpuia Tlau Court-ah a in lan a, court tualah Zotlang All NGO huaihawtin pawikhawihu chu a phu anga hrem tura phutin mipui an pungkhawm.

Protest SFX

Zotlang All NGO huaihawt punkhawmah hian Zotlang YMA, Local Council, MUP, MHIP leh MGYA bakah Bualpui Welfare leh silaimu tuar Lalhriatrenga Siakeng lehkha zirpuite an tel a, mipuite chuan pawikhawihu Rochhingpui chu a na thei ang bera hrem an duh thu an sawi.

Akashvani Aizawl zawhna chhangin Zotlang Branch YMA Vice President Pu R. Laldusanga chuan pawikhawihu Rochhingpui chu dan lova lo sumdawng thin leh ram pawn atanga ruihhlo tawlhru thin, kum 2015-ah pawh Central YMA ten an lo man tawh a ni tih an hriat thu sawiin, hetianga thubuai lo nei tawh dan anga hrem ni lova, zalen taka a awm piah lamah khawlaia silaia tualthah a tum chu an rilru a na hle a ti a, vanneihthlak taka Lalhriatrenga a thih loh vang chauha tualthat lo mai chauh nia an hriat thu sawiin, court chu a phu anga rorel tura an duh thu leh bail-a a chhuah an remti dawn lo tih a sawi a, a lo chhuak leh a nih chuan a chungah engpawh thleng se veng mipuiten mawh an phur dawn lo tih a sawi bawk a ni.

Puan tawh angin Rochhingpui hian Zotlang veng mi Lalhriatrenga Siakeng chu Bawngkawna vengah thla hmasa ni 29 zan khan an intihbuainaah silaiin a kap a. Rochhingpui hi man nghal niin Lalhriatrenga Siakeng chu Greenwood Hospital-ah enkawl mek a la ni a, investigation atanga an hmuhchhuah danin, a chuapah tui a tlin bakah a chuap a pan bawk a, ICU-ah la awm mekin, ventilator a la phawi ngam loh a ni.



NEP

Mizoram University Registrar, Prof. Lalnundanga chuan NEP hnuaiah Mizo tawng a pawimawh tulh tulh dawn nia sawiin, “University signboard-ah pawh Mizo tawng telh zel turin UGC-in a nawr tih a sawi bawk.

Pachhunga University College-a Mizo Department-in ni hnih awh ‘Tunhnai Mizo Thu leh Hla Dinmun : Hawi Lam leh Sukthlek’ an buatsaihah a khuallian, Prof. Lalnundanga chuan, sorkar laipui, Ministry of Education chuan tunhma chuan University signboard te chu Hindi leh English-a ziaik turin a ti thin tih a sawi a. NEP 2020 a lo chhuah hnu chuan mahni hnam bil tawng telh zel tawh turin a ti tih sawiin, Hindi, Mizo leh English-in signboard pawh siam zel a ngaih tawh thu a sawi.

Seminar-ah hian lehkhahu chhuah chungchang te, machine translation hmanga Google translate-a Mizo tawng telh chungchang te, Artificial Intelligence (AI) in Mizo thu leh hla a nghawng dan te, Mizo thu leh hlaa LGBTQ chungchang lo lang te, Mizo hlaa mahni nun bunruahna te, Mizo film hmasawnna leh inbiakna tawngkam lo lang te zir chian a ni dawn a. Zir chiannaah hian Mizoram chhunga mithiam hrang hrang bakah IIT Gandhinagar atang te, University of Bern, Hochschulstrasse, Switzerland atang tein mithiam an kal khawm a ni.



AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah a ni.

Zandin dar 6 leh a chanve-ah Chanchintha puan leh a ni ang.



PWD & YMA

PWD leh YMA chuan niman khan Mizorama kawngpui tha kan neih theihna tura thawhhona thuthlung an ziah chungchang an sawi ho.

Central YMA Hall-a hun hmanah hian PWD Engineer- in- Chief Pu H. Zoramliana chuan, Mizoram chhunga inkalpawhna kawngpui tha a awm theihna tura PWD leh YMA thawhhona a tha a, PWD in kawngpui enkawl an ngah thu leh sum indaihlohna avanga duhthusama enkawl theih a nih loh thu te, YMA te tawiawmna leh thawhpui an mamawh thu a sawi. MOU ziah avanga hmun tam takah hmasawnna leh kawngpui siam kawnga awlsamna an hmuh thu a sawi.

Central YMA President Pu Lalhmachhuana pawhin thusawiin YMA ten kawngpui siam te pawngpaw sawisel mai lova MoU ziah anih avanga tawiawm tur leh thawhpui tur kan nih dan te, sawisel tul a nih chuan huai taka sawisel a tul thu leh en pui zel turin YMA hruaitu kalkhawm te a chah a. PWD nena thawhhonaah theitawp chhuah a kawngpui tha kan neih theihna tura hma la turin a chah bawk.

He hunah hian Sub- Hqrs YMA, Group YMA leh Branch aiawh te an kalkhawm a. Zawhna leh chhanna hun hman a ni a, Zoram hmun hrang hranga kawngpui siam chungchanga harsatna leh kawngpui chhia chungchangte sawiho leh inhrilhfiahna hun hman a ni bawk.

YMA leh PWD te hian kum 2018 atang khan thawhhona thuthlung an lo ziaik tawh a, kum 2022-ah ziah thar leh a ni a, tun hnai August ni 8 khan kum 3 chhung atan MoU hi ziah thar leh a ni.



PM MODI PROGRAMME

Naktuk September ni 13 a Prime Minister Pu Narendra Modi an Bairabi-Sairang New Railway Line & Central Govt. Project dangte a hawnna leh project hrang hrang lungphum a phumna programme, Aizawl Lammuala tel turte chu zing dar 8:30 ah chuan a hmunah thut fel vek tawh tur a ni.

Sorkar thu chhuah tarlan danin he huna tel turte tan ei leh in ken luh phal a ni dawn lova, in ei puar sa veka kal tur a ni ang. Programme hman zawh fel hnuah chauh ei tur (refreshment) sem a ni dawn a ni.

